

晚

晴

移

詩

匯

晚晴移詩匯卷四十九目錄

湯右曾 十三首

梁佩蘭 十三首

沈廷文 一首

錢以塏 六首

彭始搏 一首

查昇 二首

孫致彌 三首

沈宗敬 一首

竇克勤 二首

陳大章 三首

史申義 五首

吳暲 七首

丁棠發 一首

高玠 一首

唐孫華 二首

董思凝 三首

蔡秉公 二首

馮璽 九首

陶自悅 八首

陶元淳 三首

趙俞 三首

沈佳 三首

陸寅二首

李塉三首

陳遇夫五首

李永昇一首

陳載華一首

楊名時三首

陳鵬年十八首

黃叔琳一首

景日珍二首

閻錫爵三首

張曾慶一首

陳汝咸一首

胡潤四首

冉覲祖三首

張瑗一首

惠周惕十三首

閻詠三首

談經正二首

張增二首

晚晴移詩匯卷四十九

徐世昌

湯右曾字西厓仁和人康熙戊辰進士改庶吉士授編修官至吏部右侍郎兼翰林院掌院學士有懷清堂

集

詩話西厓少以能詩見賞於漁洋其氣體亦頗近似黃崑圖序謂其得宇宙之清氣冷洽有天際真入想非過論也嘗應制賦文官果詩景陵和其韻有茸香密葉待詩公之句舉朝傳誦以爲榮遇

曉游朝陽巖

言尋朝陽巖煙日初弄影清暉媚幽姿散步得妙領連娟浮巖粵遠目試一騁俯瞰瀟水流含漪渺千頃探竒下幽窟潛蛟舞浪井虛徐清風來蕭灑俗緣屏林梢法華寺斷夢淒以冷清音非絃匏吟嘯坐日永

磨崖碑

青驪蜀棧眞危哉西下逝水甯東迴移軍六合卷清霽中
興大業由天開衡山山人謁靈武魚水道合無睽乖桓桓
忠勇李興郭手執枹鼓如霆雷姦兇滿盈神鬼怒將相和
協功名偕金妃木母火當殪刳屠家禍誰胚胎二京收復
凱歌入父老泣下長安街煙花紫禁列冠冕龍車鶴駕青
春回艱難秦越共肝膽安樂骨肉相嫌猜飛龍小兒竊國
柄表裏宮掖亂所階長慶樓空夾城閉玉房朱戶生青苔
淒涼西內情尙爾摘瓜況自歌黃臺漫郎攜辭意深痛滔
翁弔古留餘哀春秋史法非頌體石湖晚出空譏排平生
兩眼熟拓本愛此片石江山隈蓬州垂老嗟遠竄歲久妙
墨重摩揩攝衣拾級歷千尺孤亭下瞰雲濤堆撫時感舊

增歎息嘒猿落月同徘徊

湘山寺

花雨飄飄幢微風韻塔鈴馴鴿上齋鉢老僧閒誦經客子
入門來佛鐙晚熒熒被徑蔓蘿葛聞香啟幽扃法界優曇
華三歲始一零寺有千日蓮廊深苔蘚古地僻草木靈緬
惟咸通來日月如奔霆頽然金粟老彷彿長眉青

林喧鳥知曙鐘殷寺初曉踏石穿煙霏屈曲羅翠篠暗泉
尋石罅海眼逗雲表湘流去逶迤青山明鏡繞雲重巖岫
複水遠鳬鷗小平生慕躋攀志與禽向矯香門昨夜夢一
去墜縹緲悵焉解纜行飛鞚尙林杪

陳昇庵招游蘇門百泉

五更月墜天西南殘星耿耿配兩三出門風輕馬蹏快衣

上一帶侵山嵐蘇門縣前解鈴馭困思小憩投茅庵賢侯
東海我好友勸我劫劫姑留驂臺符吏牘劇衡石一笑不
問先幽探西門七里林谷繞斜日半嶺煙雲含涓漣已到
百泉上清暉傑閣凭耽耽水妃何年此微步明珠錯落遺
風潭千鬟萬髻作顏色太行倒插綠玉簪清冷忽聽響琴
筑駛激更不容螺蚌吾徒解衣聊快意健筆往往兼雄談
昔者東游過趵突與此清泚同所媿水晶盤中瀉冰雪一
勺便瘦吾猶甘水性悍急飲之輒瘦居人於十里外方汲桃竹園西得微路下
者捫壁高乘籃青山久無俗士駕白石尙有仙人函嘯臺
鸞鳳杳何處遺訣或者留彭聃重游後會誰與必歸路欲
覓觴酒酣環山三匝夢應熟瞥眼一過心常貪便捷休爭
百足虵纏裹莫作三眠蠶人生婚嫁有時畢便合夜雨同

冥參

橫江

紅樓白舫家家好翠壁丹崖面面稠佳處眞思市門隱生
來愛作賈胡留三江雨氣連沅口九疊山光望靖州柱史
亭前懷古客西風荊棘野塘秋

發益陽

行艫將安窮南溟阻瀾汙交流匯沅澧川路俄已半風波
話辛勤寢興錯昏旦蕭條意不愜淒厲歲云晏伊余初祇
役茗華正堪玩百卉今已腓奄忽衣裘換蒹葭天水永鳬
鷺汀洲亂落日長沙人微風洞庭岸遙岑眇欲盡近慮澹
已散鼓枻聊一吟悟賞非情歎

黃陵廟

初日黃陵廟微茫楚塞分
煙中塵漠漠祠下水沄沄
叢冷葳蕤竹湖荒散漫雲
何人酌椒醕寂寞酹湘君

泊長沙西門追念舊游有感

玉礫金沙儼畫圖
水清了了見樗蒲
湖南賓客今顛顛
暮雨湘西聽鷓鴣

百泉蘇氏小樓

垂柳垂楊綠可憐
一泓春水細生煙
小樓光景常如畫
獨客心情只似禪
紅藥喜霜三月雨
青山長憶百門泉
此身婚嫁行將了
或恐巖棲有舊緣

中秋甯遠道中

雲帆粳稻存遺島
謂覺野戍烽煙斷
古城出塞始知山
遠大入秋彌覺海
澄清樓臺何處蛟
龍氣風雨空中草
木聲

誰遣琵琶弄明月醉餘添得放歌行

送履公往往香山寺

此心宿火撥寒灰旛動鈴鳴日幾回雪裏依然吳會別
兩冬訪師半塘寺留止旬日夢中曾自洛陽來任飛白鶴先提錫欲飯青猿已築臺師到諸天合歡喜百千萬億閣門開

上十八灘

星隕如雨不在天化為怪石滄江邊章川貢川不知數搏沙撒菽誰使然一灘復一灘一灣復一灣南來贛石三百里恍在蜚風蠻雨間參錯列齒齒屈曲鳴潺潺爭流噴薄冰雪湧四面迴合巖巒環愛此萬古立積鐵濤波出沒堅且頑有時娟娟弄秀色髣髴明鏡橫煙鬟旣廉以剡神所利不夷而險天真怪消瀆撇漩敢輕上長年最能用力量

我昨青州過落瀨白雨飛灑衣裳斑打鼓發船百丈牽中
流弱纜斷蒹葭吾生微命如戲耳魚龍底用藏神姦明朝
飛榜上天柱沽酒一笑開心顏苦樂更迭無不便江鷗沙
鷺爾許閒他時放溜小艤子看我倚櫂乘風還虔州福地
昔所傳道人天眼開禪關奇峯翠巘疑可到待與猿狖相
追攀花開四照天女蓮居士之竹密不刪不須更載鬱林
石卽此便買愚公山

梁佩蘭字芝五號藥亭南海人康熙戊辰進士改庶吉
士有六瑩堂集

詩話藥亭領順治丁酉解首一時稱名元及成進士
年已六十餘入詞館未一歲卽乞假歸詩如長江大
河一瀉千里極瓌奇蒼莽之勝與王說作友善集中
酬唱甚多說作子蒲衣編嶺南三大家詩以藥亭爲
首

寄懷屈翁山客雁門

春日鳴倉庚北雁整歸翮故人在關外三載猶作客平生
論王霸中具膽與識邊地多苦寒欲以鍊筋骨側聞聘秦
女筐篚列圭璧好色而不淫國風重有德所慮柔媚腸恩
愛漸相易一旦時勢來功業不得力天南隔萬里久矣無
消息老親望門闥幼妹事締綰願言稅歸鞅省覲聊促膝
和風暝萱草皎月理琴瑟

乘螭游不周垠塢騁八荒在昔爲靈均君也今頡頏入秦
紀山川蔥鬱懷帝王想見登太華天風吹衣裳三峯墜黃
河日月背後行瞻禮白帝宮賦詩一百章英聲流琴笙古
色當琥璜引手接天河衆星隨低昂遙望赫連臺雲氣如
牛羊矯首至再三枉矢飛天狼感慨亦何爲宇宙原秣穰

養馬行

賢王愛馬如愛人人與馬並分王仁王樂養馬忘苦辛供
給王馬王之民馬日齧水草百斤大麥小麥十斗勻小豆
大豆驛遞頻馬夜齧豆仍數巡馬肥王喜王不嗔馬瘠王
怒王朴人東山教場地廣闊築廐養馬凡千羣北城馬廐
先鬼墳馬廐養馬王官軍城南馬廐近大海馬愛飲水海
水清西關馬廐在城下城下放馬馬散行城下空地多草
生馬頭食草馬尾橫王諭養馬要得馬性情馬來自邊塞
馬不輕人有齒馬服以上刑白馬王絡以珠勒黑馬王絡
以紫纓紫騮馬以桃花名斑馬綴玉纁紅馬綴金鈴王日
數馬點養馬丁一馬不見王心不甯百姓乞爲王馬王不
應

日本刀歌

市中寶刀五尺許市中賈人向予語紅毛鬼子來大洋此
刀得自日本王王使紅毛預齋戒三日授刀向刀拜龍形
虎氣生氣驕抽出天上星搖搖黃蛇之珠嵌刀首百寶刀
環未曾有有時黑夜白照人殺人血漬紫繡新陰晴不定
刀氣色風雷閃怪吼牆壁相傳國王初鑄時金生火剋合
日期鑄成魍魎魍魎伏通國髑髏作人哭人頭落地飛紙
輕水光在水鋪欲平國王恃刀好戰伐把刀一指震一國
紅毛得刀來廣州大船經過海若愁攜出市中人不識價
取千金售不得我聞此言空歎呼兵者凶器胡爲乎中國
之寶不在刀請以此刀歸紅毛

題張穆之畫獼猴挂藤圖歌

張公少年好畫馬用筆不在韓幹下畫鷹或作烏尾訛一時好事傳宣和此幅獼猴更希有我驚見之不離手深山古崖霜氣嚴石壁洗出峯稜尖枯樹蕭蕭古藤罨藤絲墜處風吹亂二猴連臂學挂藤一猴挽藤身精能迴頭側面紛相向性情總在藤絲上疑是巴南峽口來吟時莫遣騷人哀又疑逼近黃陵廟斑竹琮琤鷓鴣叫我爲作歌稱神奇真宰所造人能之張公答云安用此此曹跳躑聊爲爾

贈汪茗文民部

垂楊葉老鶯亂飛牡丹花盡黃蜂稀桑乾河水長三尺渡頭舟子催人歸我獨臨時歸不得搔首看天判南北長安當面背面塵孤客緇衣素衣色結交有何意要識公與卿蹙蹙騎短驢翻來馬猙獰馬長驢短墜溝下睨人玉鞭鞭

玉馬投刺多逢謁者嗤入門反被官奴罵
斷桐爲琴琴有心
心縲絲作絃絃有音提琴拊絃按宮徵不向大雅當誰尋
羨君文章飛健筆愛君詩句無人匹若復相尋不相見男
兒何處投膠漆上天一明月照盡萬古人人人就月照安
問故與新我有一顆珠得自龍王宮十年繫衣帶光彩與
月同試持比月恐不及海中長有鮫人泣

獨立

獨立在溪橋溪聲助寂寥夕陽帆背動秋色石林驕落葉
依歸雁疏鐘應上潮美人天外思延望一何遙

舟發閬水至饒陽道中作

路出閬江口江流亂似堆馬銜秋草去船載夕陽來石鏡
飛天照雲門跨水開前途猶未止一過一徘徊

水路隨山轉行行不厭重
汴流三百里迢遞幾千峯
此地尊漁戶秋風老客容
最憐隔江女江上采芙蓉

閣夜

百尋孤閣郡城東簾捲前山一角風
哀壑有光星在底明河無影月臨空
羣生靜息鴻濛裏秋氣森歸耳目中
不是夜深能獨醒海門誰見日初紅

春園夜集遲陶握山不至

林間相約不曾違試盡東風白袷衣
滄海樹低潮暗上夕陽煙亂鳥斜歸
酒當良會謀千盞月滿閒園迫四圍
知己豈能忘此夜年來心事對花稀

雒陽

東都遺跡與誰尋雒下詞人自古今
中嶽氣生朝日溼黃

河聲應夜鐘深平時玉几升龍卷幾度瑤笙降鶴音無限
興亡無可說一春閒對牡丹吟

鄴中

漳河流水漫無聲銅雀空留昔日名幾片瓦尋文士蹟一
邊鴉點夕陽城英雄不護生前短歌舞難忘死後情試望
西陵松柏裏夜來孤月爲誰明

沈廷文字原衡號元洲秀水人康熙戊辰一甲一名進
士授修撰有燕邸雜詠北征南歸諸集

顧詩城

鐔

視鹽長蘆

名世持籌豈小匡聲馳三輔控齊梁十年望重臺端柏萬
竈風翻海上霜路入白河秋水碧樹添紅葉暮山蒼離樽
記取東籬下驄馬歸時菊又黃

錢以塏字聞行號蔗山嘉善人康熙戊辰進士官至禮

部尙書加太子少保諡恭恪有研雲堂詩

詩話恭恪初宰粵東知茂名東莞兩邑皆有惠政稍遷山右隰州牧修復學宮書院壇廟城垣百廢俱舉入爲刑部郎擢給諫累遷至大宗伯入集諸詩皆爲牧令時作善道民隱纏綿悱惻不減次山在道州時也

望羅浮山長歌

我聞羅浮兩山稱最奇往往風雨爲合離曾傳浮海兩成一鐵橋萬丈中聯之奇峯四百三十二芙蓉朵朵青紛披遙指飛雲尤峻絕三峯錯立相肩隨麻姑玉女不可辨石樓雙峙徒依稀更聞稚川留丹竈土丸遇疾能醫治野人黃氏實高弟雞犬上昇何獨遺舊廬傳有瘖虎卧人間游戲誰其知石臼猶存千年物咄咄異鳥呼藥師朱明青霞

洞深窅懸泉千尺空中飛山神能遣五色雀遠迎嘉客疑
相期蝴蝶如輪亦異彩得轉聊當天孫絲更吟東坡松風
句梅花萬樹情依依美人一去影縹緲師雄清夢無乃癡
我披圖經豁心意仙凡迴隔長相思晴窗遙睇徘徊久何
當奮袂探靈芝野人蹤跡或許值願續古樹新題詩

隰州雜感

山氓少機巧所習惟耘耔叱牛登峻坂力盡敢言疲高原
無灌溉甘雨賴及時往往春夏間偏苦簾霖遲寒威又獨
蚤秋半草木衰未及實堅好霜雪摧殘之況乎山地瘠揮
鋤石纍纍縱令雨暘若未可籌車期我黍餉農夫仰望蒼
昊慈歲歲大有年庶勿嗟此離

人丁分上下有丁苦無田算緡但計口不問陌與阡當其

催科時比戶最可憐土窯一破甌棄之遠播遷人去丁不
去籍在焉得蠲鄰里代之輪展轉相株連及其歲已久他
鄉長曾元忽聞踪跡存重趼斂丁錢我欲除此困稅額防
虛懸繪圖思鄭俠憫此荒獨先

民居似蜂房穿壁爲營窟其外低作垣遙見窗戶列老翁
負薪歸嶮巖行蹶躓少婦遠汲水深澗瓦罍挈山坡牧牛
羊小心視飲齧晨驅驢轉磨晚呼雞棲櫟卽此誇富饒其
餘蓋藏缺豐年穀價賤人仍飽糠粃春韭與秋瓜客至乃
特設風景總蕭條念茲中腸熱亟宜噢咻之任謂陽城拙
謁南海神廟

南極開甌駱神祠鎮海天祝融尊帝條朱鳥次宮權萍沆
乾坤大光華日月旋翠旗張貝闕鯨浪息戈船離麗文明

會扶胥赫濯先九苞騰鳳嶺八柱翼星躔獅虎高蹲戶蛇

犀伏執鞭

犀後有蛇

鵬也搏角上魚目濛珠圓禪類同柴望

旂常耀鼎鑄典崇天寶載文紀至和年廟貌丹青古馨香

俎豆專豐碑全籀篆法器半珠璣佳氣承堯日祥風應舜

絃梯航來恐後鵜鶘貢爭前聖主威靈遠王言翰墨宣多

時收颶母幾處息蛟涎圭壁方壇肅鸞龍匾額懸皇華陳

祝贊典祀潔犧牲碧甃雲生殿雕梁景射磚金題光閃閃

銅鼓震闕闕齋被摳衣入趨踰執事虔木綿團錦繖孔雀

燦金錢拄笏山難捨乘潮紆漫牽波羅行復把歸棹興悠

然

固關道中

空山夜半聽村雞肅肅征鞍直指西誰鑿五丁千仞壁忽

封三晉一九泥危崖側足防蛇跡密箐垂鞭刺馬蹶呼吸
嶺頭通帝座問天應不藉丹梯

彭始搏字直上號方洲鄧州人康熙戊辰進士改庶吉

士授檢討歷官內閣學士兼禮部侍郎有方洲集

詩話禹峯諸子彬彬有文譽方洲仕最顯視學兩浙
景陵獎其公明晚以歸葬遂不復出葛巾布衣杜

門卻執詩灑
灑如其爲人

雨中泛昆明池

四山環翠一帆懸自有清音激管絃塔影雙浮雲外竦玉
華樓映水中天蠻王織厨酬題句洞主檳榔索綵箋不比
升庵了髻樣畫裙爭寫竹枝篇

查昇字仲韋號聲山海甯人康熙戊辰進士改庶吉士

授編修歷官少詹事有澹遠堂集

詩話康熙間南書房擬詔旨得參與機務地望清切
時論遂以南書房爲爭地共事者往往猜嫌嫉自
韓文懿後聲山最蒙聖祖眷注力推挽後進無爭
心然卒爲爭者所困詩詞書法四六皆擅長書教董
文敏尤爲聖祖所賞

訪吳采山不值

秋水乘孤艇沿緣亂葦間時看黃葉落境共白鷗閒林影
溪邊屋鐘聲雲外山故人今不見月出棹歌還

八里莊

斷井冰膠汲水痕炊煙三兩不成村客嫌南語呼難應門
對西風火不溫白月荒途深夜柝黃沙野菜雜蔬盆耳邊
俄覺秋溝卷卧聽驚駘斃草根

孫致彌字愷似號松坪嘉定人康熙戊辰進士改庶吉
士授編修歷官侍讀學士有杖左堂集

詩話松坪康熙初在太學已負才名已未孝昭皇
后上諭禮成頒詔朝鮮特命假二品服為副使使還
上朝鮮采風錄又十年乃入詞館鄉縣以徵漕生事
連染坐逮獄大臣有為之地者頌繫經年始得白再
遷官卒於京邸馮定遠題其集曰蠶吐五采雙雙玉
童樹覆寶蓋清談梵宮蓋用曹娥碑例謂絕好宋詩
婉麗諸暢雅近二劉他體跌宕流逸出入唐宋諸大
家非專用宋法也

江行雜詩

一舸淹晨夕平沙艤落暝江潮晴擁月山火夜燒雲黑想
蛟涎出腥愁虎氣聞明朝牽百丈回首白鷗羣

同峻思大年訪華天御先生

蒲帆片片帶斜暉路轉蒹葭興不違白露為霜楓欲脫澄
江如練雁初飛滄桑廿載衣冠在猿鶴三年事業非回首
悲笳驚日暮新亭風景一沾衣

同介修孟游集元夫園居

朱絃寥落賞音微
尊酒論心靜掩扉
遮莫文章借齒頰
底須愁病減腰圍
馱馱七日堪千里
大鳥三年始一飛
醉拂吳鉤談轉劇
主人忘送客忘歸

沈宗敬字恪庭號獅峯江南華亭人康熙戊辰進士歷

官太常寺少卿

詩話獅峯爲繹堂宗伯子兩世以文翰受知仁廟
官翰林時南巡嶽所繪山水賜清風蘭雪額又進呈
紀恩詩及琴辨畫品二說召見行在
命鼓琴御書煙嵐高曠四字賜之

由吾谷小徑登望海墩

危磴回看萬點紅
欲行且止意何窮
憑高莫定雙眸界
陟險才容一徑通
海氣蒼茫吞遠岫
雁行離合叫長空
林間可有蘇門嘯
欲訪幽人到梵宮

寶克勤字敏修號靜菴柘城人康熙戊辰進士改庶吉

士授檢討

詩話靜菴爲睢州弟子恪守師法初爲泌陽教諭論倣白鹿洞規立五社教諸生勸善規過又立童子社少者讀孝經小學稍長讀五經性理人皆興起既通籍乞假歸於郭東立書院優游訓迪學者稱寶柘城云

耿嵩陽先生邀同劉子維郭渭石耿孝標游龍潭

攜手中林去潭看第幾重懸崖流日影飛瀑潤嵩峯雷雨時交至煙霞忽半封山中多變化疑是護潛龍

赴劉子維約同郭渭石劉孟元游少林晚宿法王寺透迤嶽下共徘徊次第登臨一徑開寺護荒煙鄰虎窟潭浮肅氣近龍臺青山暮影隨波轉白雪高吟愛月來爲叩僧門聊一問紅塵何處是蓬萊

陳大章字雨山號仲夔黃岡人康熙戊辰進士改庶吉

士有玉照亭詩鈔鉤輦敝帚諸集

詩話雨山入詞館卽乞歸養母肆力詩古文辭才思敏贍與王西澗齊名稱陳王嘗撰詩傳名物輯覽百卷旁徵博引極爲繁富摘錄十二卷改題集覽付梓

九江夜泊

解帆及夕陽繫舟傍枯柳天低九派流浪抱孤城走奇峯
插斗南雄勢壓江右雲中五老人見我時招手靜夜冷魚
龍古戍沈刁斗敲枕不成眠且飲潯陽酒

登小姑山

蜀江萬里浮鴻濛洞庭勢挾彭蠡雄小姑突起插天半百
川砥柱爲之東磴道虛無動寒色漁舟一葉傍絕壁蛟鼉
正晝吼風霾決漭孤雲天地白參差樓觀麗朝霞繡璫珠
箔顏如花陰巖咫尺蓄雷雨怪樹千歲盤龍蛇吳楚雄關

此第一折戟沈沙莽蕭瑟凭欄決背倚半酣盡捲乾坤入
詩筆隔江清靄有彭郎銀河帶水遙相望舟師招手聞絕
叫急趁南風過馬當

熊襄愍公墓

鉤黨何荼酷危關迄戰爭有誰支一木空自壞長城萬古
衰宏血深山董相塋攬衣頻下拜無淚灑荒荆

罷閫歸田後囊頭對獄辭孤忠傳異代野史記當時事與
水雲逝名同日月垂夕陽孤照外猶樹大明碑

史申義字蕉飲江都人康熙戊辰進士改庶吉士授編

修厯官禮科給事中有蕪城使滇過江諸集

詩話蕉飲年十五作瓊花霜鐘諸賦入縣庠與同里
顧圖河書宣以詩相攻錯稱維揚二妙後及漁洋之
門與湯右曾西厓稱王門二弟子在詞館聖祖以
後進詩人謬澤州相國舉蕉飲及周起渭桐塋又稱

二人詩思深宵結體
清高有朱絃疏越之致

禹州

塵點征衫一月程朝涼忽覺馬颺輕
潁川風滿釣臺驛嵩少雲遮上棘城
路入舞陽山不斷田分犂櫟水常清
獨憐朱邸笙歌歇帝子宮牆蔓草生

鎮甯

古木安莊極眺平麗譙風捲戍旗聲
塔山秋草連原野放馬斜陽十二營

盤江

盤江一曲來烏巒湍迅直過七星關
匯支百粵入南海包纏尾灑流灣環者卜河深
氣候暎冬葉不落楊那山菖蒲芭蕉同一綠
楓香橘熟紅爛爛沿江雨氣隔霧縠諸嶺秀

色拖煙鬢筍輿鴉軋度山麓輕衫軟履憐底孱溫磨想及
春三月明鏡江流飛白鷗

哈馬莊

羊腸百曲路高低江上愁心聽馬嘶斜鞚金鞭那忍下亂
山容易蹶霜蹶

懷查夏重

笑指君山一髮青
清明湖容易見春星
思伊月黑寥天句能
使湘江泣百靈

月黑寥天夜有光
君洞庭湖中詩

吳暲字元朗太倉人康熙戊辰進士授戶部主事歷官
兵科給事中有西齋集

陳說巖曰元朗承先人之緒戊辰對策萬言超然獨
異予在內閣元朗以曹郎考選科道官上問此輩人
中有知者否廷敬奏言吳暲有文詩名最盛是日試
奏議果第一授給事中亡何以酒會細故落職上惜

其才命修書及分書得書畫譜同時被命者侍郎孫君樹峯中丞宋君堅齋學士王君麓臺給諫王君耳谿皆雅重元朗雖以諸公蒐羅編纂之勤而元朗尤畫考夕檣樵脂繼晷殫精積瘁爲書百卷將呈進遭太夫人故歸卒以孝死沈歸愚曰西齋爲梅村令桐工於詩筆近體清穩尤稱雅音詩話西齋集十卷乾隆辛卯沈沃田後序云以會勘銓司陳某焚燬既訖得實而陳誣以挾嫌列奏坐免官案此卽康熙四十四年王原王銓劾陳汝弼事廷訊陳汝弼雖未受賄但有錯用黃鍾之處已經革職無庸議將原審三法司堂司鹿樵感舊六十韻備述梅酒會細故所未詳也集中鹿樵感舊六十韻備述梅村出處本末乙酉詩注云時以竹籠蒸御書西岳廟碑褻工云火焙後翰墨千年不落又言是日召入暢春苑命畫清溪書屋屏風祭酒夙以畫名給諫紹其世業也過拂水山莊題亭林集二詩從別裁集補錄歸愚以和東海尚書洞庭山居後二首誤列贈王將軍紫厓詩中評語傳會將軍能詩復能著書管領名園云云亦可謂疏謬矣

禮部觀樂歌

丙寅冬至前一日禮部葬式尙書左右

向坐堂之下金鼓雜作少焉陳百戲於庭執紅編竹器狀如小篋而左右向者數人騎而被甲載兵

手旌旄而前者五六人進退止齊如戰陣然已而騎
者勝橫刀者敗執戟獻醜如受俘然既退復有釋
色戎衣持一險竿而趨者一人隨而騰身跳踔往
來如飛者數人訊之堂吏曰此高麗筋斗法也又
有二童子各首戴瓷盆口銜一小竹杖上下俯仰
以竹叩盆鏗然可聽凡其所爲悅心駭目之狀不
可勝紀頃之本部梨園子弟上堂奏伎彷彿似元
人院本之類曲終二人搯袖起舞動搖頓挫皆按
節拍與堂右一人歌鳴鳴之聲相應視之則服紫
貂而東向者也子旣得從都人之後往觀斯
樂退乃作詩紀之庶後之君子有所傳信焉

黃花十月罷冬狩天門萬乘爭飛揚朱韉側目海青倦鷹
人夜閉天鷲房大庖充盈從臣醉紫駝出釜燒黃羊由茲
三冬例修譙玉階奔走儀曹郎數人執旄導且立中權後
勁參顏行三聲威栗撻鼓動松山千騎驕騰驤颺如陷陳
蔽原野歡如獲醜獻廟廊虎臣稽首秬卣賜綠沈赤葆交
旗槍須臾參差手技入高麗筋斗各鬪強錦韉絳帔往來

便翻身如電搖朱光花鬢頭戴口銜竹翻覆不墜聲鏗鏘
清商別部更前奏曲終爲樂歌泱泱公卿擯袖起且舞銀
貂垂手紛低昂回旋頓挫巧伸縮睥睨驚座鬚眉張君不
見太平天子盛明德合歡舞樂登于堂以雅以南不僭簫
朱離韎任都陳將何如今日四海一優曇花下披雲章春
官檔子拜手紀治世之樂誰相方

和振西贈王將軍紫厓

九尺鬚眉七十身眼中遺老更何人將軍競病詩無敵弟
子丹青筆有神談笑尙能開霹靂太平不復畫麒麟酒酣
拔劍聽君語爲感窮途意自親

題徐太僕遺象

金璫禍國歎荆榛只爲鬚眉不計身四海清流眞直節五

朝舊德老遺民獨允元禮彈常侍共辛林宗免黨人畫象
世傳吳中先賢畫象一卷

詠野航齋前所蓄白鷺雛

少小煙波掠葦叢霜衣曾伴杜陵翁甯貪金闕三霄露卻
背江湖萬里風靜看梳翎添檻碧有時翹足映花紅舍人
宅裏相憐惜生長俱同水國中

題顧亭林遺集和汪安公編修

野哭東風學采薇纍臣白首尙單衣江山有恨憂天醉草
木無情長地肥避吏趙岐誰共語離家王粲不思歸祇餘
帷蓋蘭臺舊萬卷淒涼辨是非

席上贈張穉昭

相府蓮歌樂府春清尊檀板話窮塵誰傳天寶淒涼曲柳

市當年舊玉人

花前葉底貢聲新
夢斷昭華玉殿塵
記得雲間歌第一
貞元朝士已無人

丁棠發字燕公號卓峯晚號一餐居士嘉善人康熙戊辰進士由知縣歷官京畿道監察御史

憶揚州

煙花佳麗古揚州
隋帝行宮跡尙留
錦纜船歸楊柳岸
玉臺花發廣陵秋
中宵明月聞歌吹
十里珠簾捲畫樓
油壁香車虛客夢
爲言小杜未曾游

高玠字荆襄柘城人康熙戊辰進士由中書歷官山東道監察御史

詩話荆襄以請建儲謫從軍十三言官之一也居塞下六年始放還講學文正書院爲一時學者所宗

送李侍郎

紫禁星霜四十年，峻嶒玉骨自珊珊。粗宣臣力酬明主，乞放閒身作散仙。四海名流多避席，中朝耆舊半隨肩。何人最有臨歧恨，曾辱恩知未第前。

唐孫華字實君，太倉人。康熙戊辰進士，官吏部主事。有

東江詩鈔

詩話實君勵志博聞，中年卽歸田，壽至九十餘，詩尚質實不苟。爲華藻嘗戲詠門神，一時爭傳。和歸愚譏爲專取鱗爪信然。

閒居寫懷

屈伸固有命，秋毫非人功。三世不徙官，執戟老揚雄。荀爽起布衣，百日至三公。猿臂終數奇，李蔡本下中。方壯旣悼顏，皓首仍悲馮。世有巧而躓，亦或拙而通。憂喜塞翁馬，得

失楚人弓時命苟不諧不如安固窮

讀梅村先生鹿樵紀聞有感題長句

一旅誰知扼紫荊
蜩螳聒耳至紛爭
腹書競伏狐鳴火
手蔗頻驚鶴唳兵
直待臨危思翦牧
可應先事戮韓彭
石頭袁粲真堪惜
自壞邊關萬里城

董思凝字養齋號石帆平原人康熙戊辰進士歷官直隸口北道參議有海棠巢小草淮行草

金魚池

垂楊疏影繞晴沙
魚藻池連十萬家
望裏波光看不盡
谿煙都上野棠花

東昌道中

輕風五兩此經行
曲岸停舟夜火明
落日樓臺臨遠水
中

宵鼓角起嚴城射書人去碑常在洗耳風高俗尙清聞道
園林多勝概柳塘桃塢櫂歌聲

過宿遷值河水泛決夾河皆成巨浸行百餘里始入
新河卽景有作

年年憂河決六月浪深時已逐魚龍怒還生禾稼悲雨來
帆影重風急櫂聲遲曾識麻姑語桑田會有期

蔡秉公字去私號雨田南昌人康熙戊辰進士厯官台
州知府有留餘草

山塘驛次壁間韻

攀條老淚墜天涯悵望雲端白鹿車山好幾疑身入畫日
斜遙指店爲家緣村桐樹垂黃實繞澗藤梢落紫花地僻
莫嫌迎送少眼前風景不須賒

寓普賢寺邀八大山人小飲

薄暮招攜聽鳥聲樓頭鐘鼓未須驚水雲坐我渾如夢鬢
髮催人太不情寫興久輸詩伯健低頭殊愧野翁清十年
蹤迹衣塵滿此際相看眼倍明

馮璽字敬南號竹窗代州人康熙戊辰進士由中書厯

官南甯同知有芋甯堂詩草

詩話敬南精研經史旁及百家與萬斯同孔尚任李
堪王源相與論學期徵諸實用居官有政績粵撫彭
鵬特疏薦之會遭父憂既免喪
卒於京邸年未四十時論惜之

甲戌守歲

歲去不復留將焉用守爲辟如東逝水滔滔信所之雖欲
挽之歸一寸不可移把酒強相守屢問夜何其星宿漸零
落今歲忽已辭明歲視今歲才爲一日期但恐日復日毛

髮暗中衰夜窗冉冉明澹日生寒姿一年遂已添吾生亦有涯

明發懷二人游子隔鄉縣團圞諸弟姊昨夜夢中見似爲念遠人悽愴雜歡宴離魂入杳渺微茫不可辨白雲千里飛舒卷如匹練歲月高堂增塵土一身賤颯颯空庭風打窗起積霰

四時相代新一身守其故時乎不再來高坐歲已暮膝下數孺子頭角漸云露賦詩知節物題符染毫素放假足歡娛各從性所務我欲從之嬉拘牽羞舉措功名感歲華奔走寡歡趣總角曾幾時去我忽如鶩

詠懷

凜凜巖下風槭槭澗邊樹慘慘游子顏萋萋芳草渡曖曖

遠村影黯黯夕陽暮昔爲貴公子今日怨行路路長不可
極人生如朝露

送張伯史下第歸

故人不得意歸卧故山岑夜靜一尊酒月明千里心君今
任放達余亦愛浮沈去矣長安道孤雲何處尋
騁才時倚馬著論或經年解道工無益猶矜賦必傳自甘
蒙鷃笑未肯受蚋憐最惜斯文意蒼茫落日縣
學道將十載榮枯已兩忘但愁無薄祿何以慰高堂慘淡
交朋淚風塵客子裝誰能吹黍谷一爲變春陽

榮河訪梅蒞園明府

山回隔縣門路曲傍沙痕野水明殘日孤煙生遠村旅遊
消白晝古道怯黃昏且就汾陰宰今宵醉一尊

衡陽路

我家雁門下與雁俱南來今日衡陽路雁回人未回

陶自悅字心兌號艾圃武進人康熙戊辰進士歷官澤

州知州有亦樂堂詩草

謀話艾圃工制藝與韓慕廬齊名聞於景陵召入都病乞歸亦樂堂詩寥寥二十餘篇音旨清越多可取者蓋以遜庵父子爲師友詩格亦與南田爲近前人選輯率未之及也

秋夜

秋夜夜未長勞人斂衿裯徙倚坐空堂宵與精靈會落月下河梁白雲互如帶飛螢立草頭嘒盤半櫺外對此懷百憂驚魂逐浮芥慘愴念同生蕭寥邈先派咄哉歲月流心迹絕谿介須臾雞復鳴噉嚙露猶靄身世亮若斯艱難歎徒慨

寄懷中表唐四弟致堯

歲晏芳草歇日夕沈湖陰萋萋雲彌渚肅肅風動林北窗
既止酒東園且罷琴偶然謝援羨願言懷賞心何處
所迢遙限南城平原我搖蕩新豐子滯淫襟期豁蓬戶分
理安華楹伯倫醉悠忽茂倫醒崎嶇紛務罕酬對元賞遂
兼并縹緗畫束閣墨牀夜疑塵素心渺秋水妙響流瓶笙
秋水瓶笙皆
唐家軒館也布算輒忘悲聽歌忽霑襟不知白日逝詎憶
高臺傾燧火轉林木寒蟬散秋岑秦王苦服藥漢帝樂長
生金莖露泥泥璇房日沈沈馳驟隙中駒飄搖風裏鐙君
子厥儲待小人困飛騰形骸守寥廓志願徒崢嶸榮名豈
足期得意良有任長歌歡友報引領佇瑤音

贈玉度

秦雲一夜飛千尺藥欄膩葉蟠空碧神娥喚雨下巫陽瑤
瑟泠泠萬山澈我有新愁隔湘浦市南曲陌逢蔣詡陌頭
楊柳驕含煙長條拂面思當年停杯月射黃金匣橫笛風
吹白玉鞭此日逢迎何草草自倚紅顏長美好子雲獻賦
入長安我卧空山惜花鳥海石塵飛桂水深江郎已老廬
卿貧三徑落花愁暮雲南山瀉影迴空村村口梅風飄燕
麥春酌沈沈永今夕莫將心事問三秦茂陵柏掃千尋壁
迷魂沈沈歸不得荼蘼香深月華白南方佳人誰第一領
袖風流君獨絕辟穀孤游張子房聽笳高嘯劉越石雲去
天空成暫隔龍池夢斷山陰雪陸家兄弟青雲客與君結
交重心骨呼來與君共倒金錯杯我亦爲君高歌狂叫生
風雷臨觴不醉君何來

贈惲子正叔

我昔渡江來與君隔吳越君今渡江來與我去咫尺咫尺
咫尺不相見江濤拍天兩腳亂道無行車泥沒肝君折江
離當薇蕨我抱青箱營束帛井底雙龍枯欲死羝羊觸藩
那可出楚雲蜀月空消息五嶽崢嶸起胸臆酒酣叫五盧
百萬恣一擲甯投白璧贈青蠅不惜黃金買駿骨喜君來
遲君久飲君酒握君手愛君知君情獨苦懷抱欲吐不得
吐空山昨夜弔螭蛄江上何人妒鸚鵡我有朱絃琴爲君
鼓再行越音淒微不可聽故都煙樹空冥冥楚歌激越驚
鬼神坐客掩耳心屏營漫漫長夜雞不鳴天寒日暮離愁
深贈君芙蓉花芙蓉慘無色贈君楊柳枝楊柳不堪折我
有匣中龍一雄復一雌與君結佩相扶持躍水變化會有

時

奉寄孫先生

蘇門長嘯後誰復識孫登齒礪南山石心枯北海僧百年
閒鶴立千里困龍騰卻羨平湖雁冥冥巧避矰

十一月朔江上贈惲生兼呈張子

仙人騎鶴渡江來卻望南山蒼蔚開何待呼龍種朱草袖
中雲氣是蓬萊

吳綾百幅老朱顏壯志空令物外閒辟穀何年辭帝子采
芝今日見商山

清齋不爲學長生長跪高堂獻芋羹歌罷采薇人尙少肯
因龍卧老躬耕

陶元淳字子師常熟人康熙己未舉博學鴻詞未與試

戊辰進士官廣東昌化知縣有南崖集

詩話子師廷試對策力言均賦時稱剗切及官瓊海小邑行清丈祿積弊有浮糧請蠲不可後其子正靖官諫垣疏陳竟得請焉國史列入循吏在官強項忤大吏詩中有云況復勞心陽子拙敢云流涕賈生才又云徼外山河逢客醉心頭鐵石向人寒具見生平節概

臬使劉公枉書惠存詩以志感

一官萬里尹蒿萊幾個生前歸去來
況復勞心陽子拙敢云流涕賈生才
晴消瘴霧千山淨春到蠻花滿地開
從此不愁風土異生還終望我公哀

和唐張謂韻

道路非難作吏難一洲鼇背立郊壇
人言瓊管曾開府我道囚山合挂冠
萬里親知春夢斷一生事業暮潮寒
新恩已是投荒處卻望新恩福地看

如此窮途欲進難朝天漫上越王壇跼高不合伸強項逐
裸何須岸大冠徼外山河逢客醉心頭鐵石向人寒長安
日下猶言遠窮海孤臣那得看

趙俞字文饒嘉定人康熙戊辰進士官定陶知縣有紂

寒亭詩集

沈歸愚曰文饒詩體靈敏之中冲和
自在不失陳黃門之遺是爲正聲

舟行晚過青浦

孤篷秋氣入此夕客心驚露白浩無際蟲吟併一聲塔隨
帆影走潮湧月輪行磔磔城烏起譙樓已二更

侯官陳省齋編修自遼左入都率爾投贈

才名弱歲冠羣賢豈料遭逢坎壈纏陷賊曾修衣帶表投
荒竟謫夜郎天君恩衰白全要領物論雌黃待簡編蘇李

於今皆返國細將心迹訴當年

彭無山給諫自河工召復原官喜而有作

三年薄宦卧江干鳴鳳今朝刷羽翰暫屈鄴侯參幕佐忽
宣唐介拜原官重來寰海皆傾聽一入朝廷便改觀漢室
淮陽終不召須知納諫古今難

沈佳字昭嗣錢塘人康熙戊辰進士官安化知縣有復
齋詩集

春雨寄王子

南山終日沈煙霧卷簾忘卻湖中樹野鳥爭喧沙岸旁行
人醉失溪邊路渡頭楊柳已增悲遙憐楚客重相思白雲
湖上銜杯日爲憶春風花落時

宿陳氏山齋

夜色涼侵簾蕭然四壁陰短牆猶月色虛竹有龍吟雲卧
耽幽徑天清空梵音惟餘元勝理習靜對遙岑

荒荒山氣白澹澹水增波野曠漁燈暗林深鳥語多傳杯
依石磴高詠藉青莎飛動平生意據懷任嘯歌

陸寅字冠周錢塘人康熙戊辰進士

詩話冠周麗京子麗京坐史獄得免棄家出游冠周
行求得之迎以歸居數年復出游冠周徧訪終不復
遇竹垞爲作零丁以寄哀
慕幽憂畢生未就銓除

秋日憶家大人粵游

又見秋風動蘆花江渚飛忍看時序變猶與老親違遠信
無他語深情祇望歸應憐揮手日兒女共牽衣

自笑

自笑桑弧志天涯只布衣到家翻是客逆旅豈如歸白日

從愁盡青山入夢非緘書與僮僕爲掃釣魚磯

李堪字剛主號恕谷蠡縣人康熙庚午舉人官通州學

正從祀孔廟

詩話恕谷四歲父孝愨先生日授孝經古詩及內則
少儀祖素先翁鸞小弓引之學射既冠從習齋游習
齋教以學曲禮自二十三歲立一歲常儀功終身不
輟嘗絕糧作嗟哉行有云男兒號貧本非人但視高
堂淚如珠然外爲足食狀不令孝愨知也作大學辨
業言物卽大司徒之論三物言格物卽學禮樂射御
書數之物與萬季野論經史及聲韻季野歸檢之次
日晤恕谷曰俱如先生言天下惟先生與下走耳王
崑繩西行留詩有云李子生蠡吾懿訓本家承師傳
得絕學一洗羣言空三物以爲緯四教以爲經卽此
達性天下學德乃崇不格學外物博文約在躬卽此
爲修齊卽此造平成乾坤劃開豁日月森精銳俯仰
千古間儒術何夢夢恕谷七十五歲病篤遺詩云情
識劫年運足傷北邙山下月生光九京若遇賢師友
爲識酒酒

牛善長公郎入國學

五公山下授遺箋長著征西第一鞭更看阿戎賓上國猿
公飛劍晚霜天

酬倪允懋因步其韻

自從鄒叟沒誰復定一是明明承儒統隱隱已偏倚沿流
至南宋朱陸皆禪喜語錄徒增加乾坤莫經理神州遂陸
沈無人責諸己習齋痛覆轍披古懷芳軌天人自負荷明
親竟端委謫陋步其後衰老憂頽靡忽從宦海中間聲懷
彼美目電四存編神傾北楊里千山萬壑人竭來共踐履
謂予非故爾正學原如此願告偕同人卓立洗所恥新春
桃李妍聖道從茲起三復貺我吟把臂情何已

仲冬三日雪同余光若飲燧侯齋

何意鋪銀海同來問酒泉始知若下里不數歲寒年白眼

天同調青樽主更憐支離老叟話猶說義熙前

陳遇夫字廷際號交甫廣東新甯人康熙庚午舉人雍正

正元年舉孝廉方正有涉需堂集

詩話父甫領解首以垂老遂不謁選潔身砥行淹貫載籍撰正學續述漢唐諸儒統緒相承未嘗中絕重訂白少年譜明其學出博反約非關禪悟子瀚本深甲午復領解首性至孝取予一介不苟克承其教

桐洲雜詩

遠俗宜吾道移家住水村估帆朝逐市漁火夜過門風靜
微留岸潮歸淺出源小洲行處有隨意築新園

久坐翻成倦穿林出水隈寒雲陰欲合疏雨去還來地託
鷓鴣足天寬樗櫟材滑泥妨客過魚鳥共徘徊

西園連平野編籬作蔽牆疏桐方向暝密竹未成行四面
漁樵入經年風雨狂漸看春意好花發讀書堂

寸心無限事筆札豈能傳月上行吟處雲生水檻前滄浪
花惜鬢索莫酒忘眠莫作相如賦無人換一錢

江門晚泊

江門春水晚來風一望微茫向遠空幾夕波濤驚客夢十
年滄海老漁翁潮生厓島遙天白雲散疏林野火紅賴有
醉鄉風日好一尊長卧月明中

李永昇字志南號青郊蘄州人康熙庚午舉人有若鳧
村詩集

游東山寺

數里招提路崎嶇不易尋山隨黃葉亂寺共白雲深世界
煙霞外諸天鐘磬沈何因登寶地信宿戀株林

陳載華字仙掌號咫園益陽人康熙庚午武舉官洞庭

千總有復齋詩集

遣興

筍長宜新雨蘭香沁曉風微吟春色外寄興酒杯中鶴化
悲丁令鷗閒逐海翁山間容我老時自課兒童

楊名時字賓實江陰人康熙辛未進士改庶吉士授檢討
官至禮部尙書贈太子太傅諡文定有楊文定集
瀛洲亭秋夜讀書

盛代崇文地雖離起鳳鳴尊經羅墳典開館延豪英秋色
入庭宇槐風日夜清請業瞻人範休居樂友聲欣茲作人
澤敢忘稽古情旁搜愜心賞默識探其精抗懷在千載微
音聊可賡嚮晦萬感息羣動寂無營素節兼靜候道機日
以生壁空門不掩時見孤月明

安溪夫子示留別之作輒賦鄙言呈誨

邃古斯文啟聖作垂爲經尼山手修定炳然陳日星理非
由外鑠期復性踐形深慈拯迷沒振鐸使之醒邈邈漢唐
來名儒亦挺出見本末刊枝猶爲後賢黜榮華限小成與
聖固異術卓哉濂洛興標末悉芟銍靜虛而敬直心學相
授述靈鍾闡嶠開哲人後先匹接跡五百餘宗盟罔替佚
脈絡得真傳精微或超逸六籍撥沉翳百家匯爲一源自
崑崙注環混無淪汨浩然沛九垓卷之藏於密淵乎夫子
心誰與嗣音者知之悵已艱允蹈怯尤寡小子亟沿洄躑
躑類駑馬自茲痛懲艾圖新舊云舍抗志懷明哲努力崇
大雅勿塞涓涓流涼踞任譏野脈爾守心箴長希入聖治
高山望豈賒一仰一傾寫

豐澤園御試論賦蒙賜飲饌仰聆訓誨恭紀

聖代文明盛薰風禁籞開溫綸宣玉闕綵仗莅仙臺捧日
彈冠慶承恩珥筆陪榮光浮太液瑞靄接蓬萊濛櫟清荷
裏維舟翠荻隈華班佳樹下珍膳御廚來散步通璇圖環
池藉繡苔香分天祿札文待孟堅才湛露霑天澤霈雲挹
帝杯爐煙臨水泛苑鳥隔花催納卷勞詢問隨人賜翦裁
重聞申巽命竊幸荷深培顧分彌知惕捫衷敢自猜抒誠
盟夙夕秉訓凜昭回永戒虛憍習期殫樗櫟材皇仁踰海
嶽何以效涓埃

陳鵬年字北溟號滄洲湘潭人康熙辛未進士官至江

南河道總督諡恪勤有滄洲詩集

詩話恪勤奮起孤寒壹意爲廉直吏初令浙之西安
白烈婦徐寃有能聲遂甯張文端督南河疏薦移宰

山陽遷牧海州守江甯所至興利除弊懲姦雪枉民
爭頌之南市樓者故明十四樓之一格勤撤去之更
爲堂宣講聖論總督阿山惡其疆項撫此事以大不
敬論劾景陵曲宥之召修書尋復守蘇州政如江
甯又忤總督噶禮恪勤游虎邱賦詩噶禮傳會以爲
誹謗景陵傳示近臣斥爲誣妄復以修書召再出
爲霸昌道命佐文端治河尋授河督景陵上賓感
勵遺疾卒官詩以沈鬱頓挫抑揚排蕩見長蓋得於
工部爲多

李客山見過投詩次來韻

蟋蟀吟前除鷓鴣鳴夕陽聞君采芙蓉辛苦涉秋江
不可際沐浴休此堂俯視白日速仰見浮雲蒼清機理瑤
詠尊酒聊慨慷感茲千古情前期渺茫茫

伊余旅琳宮客歲寒方迥及此屆金商月琯已十度茲豈
無故然天地有成數憂患苟不歷誰能辨甘苦顧慚鶩鈍
姿厲此松柏固片言勸余心馨香擬蘭杜

壬辰仲冬費滋衡江服懿林中山蘇梅仙枉集寓齋

用海日生殘夜江春入舊年爲韻分得生入二字

窮冬在深谷寂寞懷友生豈期江上帆遂此山中行
山中何所有濁酒陳糲羹同心四五人懷抱各相傾
明月從東來霜露皓已盈甯知夜將半瑤琴轉淒清
臣罪則當誅天王荷聖明文章固小技珍重同璜玕
自非堯舜時難免世網嬰小人貴苟全君子畏
令名鷗盟慎儔侶各立以屏營費江名下士灑落富
篇什況有林與蘇高狂每相及獨笑老陳髯蟲魚徒
摭拾丹房靜無事良朋偶然集山高眾竊肅帝座可
呼吸酒闌步山椒遙青若拱揖念茲鐵甕城兵農素
和輯萬井鎖寒煙日暮軍聲入東南控滄海丞徒在
嫺習近聞樓船軍奔鯨吼山立仍勞至尊顧冠蓋交
馳急

揚子盛帆檣瀟湘憶蓑笠安得趁東風細雨春船溼

月華山歌爲梁道士作

我昔看山到京口郭璞墳前灑杯酒揚子渡頭爭渡急不
使焦山落吾手廿年宦海吳越游天駟之乘沙棠舟元規
障塵滿天地蓬壺那得尋丹邱去年長夏凡再至停橈一
上江天寺江波漣漣鳴向人手板腰圍汗流漬深秋奉檄
馳江干快遂初衣返釣竿黃茅雨溼鷓鴣叫欲歸不歸行
路難南冠驅迫何恩遽遙指月華最深處四時羈絆五六
人暫借丹房度朝暮丹房老子人姓梁雙瞳炯炯眉髮黃
盡日低頭弄柔翰一生古貌游羲皇深山窮谷君合止胡
爲混跡紅塵裏爲言咫尺卽瀛洲試看天吳移海水仙人
自昔好樓居我亦蒲團坐碧虛寫罷黃庭夢靈對手招老

鶴眠遽廬月華之山山色好俯視羣山揖蒼昊兒時住此
今白頭銀杏手栽成合抱月華之山高嵯峨三山海面浮
髻螺下瞰魚龍等么麼興來賭盡山陰鵝屈指今年纔六
十故舊兒孫且雲集好貯鱗脯泛流霞不採芝肪煮白石
酌君酒祝君篇我茲與爾非少年人生三萬六千日但得
長閒不羨仙

題王石谷山水

突兀見山山不移雲光樹影搖參差平橋跨壑幾千尺橋
下水聲無已時溪北溪南路如綫來往騎行彷彿見谷靜
雲深人不知萬松獨鎖空王殿別構精廬杳靄間千盤鳥
道難躋攀有路纔通避秦客無錢得買支公山作此者誰
石谷子筆補造化真奇詭坐卧十日滄洲髣游仙只住青

冥裏

兩割肉行爲新安汪節婦壽

婦吳氏值閭變舅病噎割左臂肉以進病霍然

賊圍村聞孝婦事輒解去夫死揚州觀歸以不獲從死割右臂肉以薦松明山其所居也

松明孝婦兩臂枯刀痕濺血雙模糊一救阿翁一奠夫肌膚判盡形容癯翁病不瘳夫不起兒命雖存頃刻耳捐軀不得且割身一盞羹湯盡生死鬼神夜泣天爲愁病者旋愈死已休祇今七十獲遐福壽考百歲焉能酬臂瘕夜寒老淚溼階下兒孫早林立拖青曳紫共扶持笑口聊開錦堂集君不見當時松明村倉卒盜賊如雲屯一聞孝婦卽卻走鄉閭無恙雞犬存此事流傳咸歎息立懦廉頑本奇特世上豈無梟獍與窮奇解道平人不如賊

新春雜感次韻和中山

鐵甕城邊路金焦江上山蛟螭蟠地軸豺虎亂天關皎日
羣陰散春風十畝閒煙雲儼圖畫蠟屐好躋攀

漫興

秋氣漸蕭瑟連宵風雨聲庭虛山果墜砌冷候蟲鳴倦眼
依殘帙端居對短檠歸舟姜被隔知近武昌城

兒歸依叔父好去問重闈但說君恩重休煩老淚揮從師
仍適遠多難在知幾不用徒酸鼻長途正授衣

冬春如過隙秋老尙羈棲久暫吾何擇榮枯理亦齊裹糧
師白石行藥想丹梯日話黃冠侶三茅近弗迷

客從故鄉至爲我理瑤琴流水本無意高雲若有心朔風
吹早雁落葉下疏林之子不歸去衡山空自深

庭階秋色好映日正殷紅頗賴扶持力其如造化工醜顏

醒復醉嫩葉老還童最愛斜陽裏紛披並菊叢

江干

愁雲毒霧鎖江干院落沈沈晝景寒
貌虎千重森鐵甕宵霄何日下金竿
迢迢肺石呼難徹寂寞丹心淚已乾
蟣蝨一身天萬里仍依北極望長安

院名北極閣

與許謹齋都諫夜話

琪樹琳宮鎖寂寥逢君燒燭坐寒宵
三春華髮棲江表五夜丹心戀聖朝
禁闔似聞還讜直湖山自合老漁樵
鯉魚風裏桃花水共聽南徐早晚潮

移寓城南草堂紀興

北堂遙隔楚雲西遠近浮槎理亦齊
豈有園官供菜把仍催穉子樹雞棲
寄奴井在泉湛汲丁卯橋荒路不迷
比似

成都留杜老居人指是浣花溪

虎邱

雲艇松龕閣歲時廿年蹤跡烏魚知春風再掃生公石落
照仍銜短簿祠雨後萬松全還匝雲中雙塔半迷離夕佳
亭上憑闌處紅葉青山繞夢思

塵鞅刪除半嚮閒青鞋布襪也看山離宮路出雲霄上法
駕春留紫翠間代謝已憐金氣盡再來偏笑石頭頑棟花
風後游人歇一任鷗盟數往還

黃叔琳字崑圃宛平人康熙辛未一甲三名進士授編
修官至吏部侍郎重宴瓊林

送孫文博之雲南省覲

此去行歌陟岵詩短長亭外柳如絲雨過山驛雞鳴竹風

送江程欬挂枝花下迎親依曉署尊前憶弟夢春池可能
裁得相思錦六六紅鱗寄莫遲

景日珍字東暘登封人康熙辛未進士授知縣行取御
史官至禮部侍郎有嵩厓集

途中夏旱

馬倦嘶長道搖鞭入紫霞遠天疏斷樹落日盡荒沙野鳥
翻林影村童掘草芽何當風雨至旅夜說農家

貽內

雨過山城曉園花次第開遙知明月夜猶自倚妝臺客鯉
催鄉夢新衣照舊裁高堂如獻壽爲我著斑萊

閻錫爵字荊州固始人康熙辛未進士改庶吉士授檢
討歷官侍讀學士有師婁堂詩藁

詩話荊州天性豪邁爲詩抒寫性情不求工字句而
自合矩度爲靜海勵文格公所重自讀書中祕歷官
禁近屢掌文衡凡山川風土古今掌故多
見之篇中惜身後搜集不完多所散佚

贈粟

麥黃雨洗白晴乾
麪黑苦斗不滿十錢
價輕賤如土里長
下鄉來
猱獮過猛虎茅屋居中坐
探懷出催簿指簿呼姓
名不啻奴與虜
小心奉殷勤酒食猶帶怒
謂自入公門多年
識規矩非由上官差
誰敢問花戶
昨日蒙鈞帖上插飛
毛羽嚴行提經承
郡縣難作主
急索春夏糧期限
不過五
東南西北鄉奔波
酸雨股片刻何有
停四處相討取離
家
連今朝明歸恰當
午聞言耽時光遲
挨亦何補耕地須
輸
租向誰訴貧窶
圈有子母牛大小
聽客估月上深
醉行咆
哮動村塢去去
莫重來家家欲
懸釜聞君旋井
開只恐遭

其侮情知不可留聊贈粟一庾

海波

怪天不合生水多藏匿蛟龍挾風波尋常聚族如雞伏造
次凌空變妖魔震雷掣電日月昏倒海移山禽獸尊得時
雨鼉戲高岸失地松楸泣斷魂鳳毛五色差堪舉驥蹏干
里何由奔神堯當之亦傲予肯使匪類長兒孫吁嗟蠢動
自取滅誅盡殺完覺轉拙明珠珊瑚莫浪求淵底卧熟泥
蟠穴密網鉅鉤乍浮沈大小骨肉驚吐舌一自搜索往來
頻吞聲涕淚幾斗血藏身百慮目長吁無聊走險成下愚
揚鬚鼓鬣揮利爪興雲作霧奮微軀豈能敢與天爲仇不
過苟延活斯須崇有山卑有泉各得其所應帖然置膏烈
火空熬煎

送公安令許于磐

高陵南望碧波流但見公安水上浮
青草蛙鳴騎馬路夕陽客渡釣魚舟
凌風白鳥臨前浦向日紅蕖映晚樓
怪道神仙來吏隱更于何地覓瀛洲

張曾慶字子餘華州人康熙辛未進士
改庶吉士授編修歷官侍講

自城內移居東谿

亂後居難定秋深念轉生
翻書存杜老問卜少君平
落日孤村暗荒煙萬樹橫
匣中埋劍氣鬱鬱向誰鳴

陳汝咸字莘學號悔廬鄞縣人康熙辛未進士
改庶吉士授知縣歷官大理寺少卿有心齋集

曉渡沂水

朦朧斜月曙星殘藥餌和丸當早餐曉色漸分人影亂風聲未到客衣寒虺虺疲馬愁霜滑杓略溪橋怯路難何日故園茅舍穩閉門高卧日三竿

胡潤字河九一字京蒙號艮園江夏人康熙辛未進士改庶吉士授編修歷官庶子有懷蘇堂集

游黃庭觀

戊子寓衡山值地方有事嶽廟山中千年老松並伐無餘而奉行墾荒下吏督責過

巖民無聊賴相率逃亡感而爲此

我游黃庭風景暮拄杖登危無好遇怪見千夫伐老松州郡督郵走無數龍鱗短楸送飛巖鳳羽長梢委散霧攬身直上飛仙石下見龍潭鬱吼怒老龍奮髯亦何爲昨夜雷聲雨驟注千嶂萬竇爭一門不見潺湲有旁赴聞道山靈擁百脈吮澗汲巖歸此路神物難悅轉生噴憑高噴沫傾

一吐排山倒海勢莫當千里聞聲悚百懼臨流倚杖正太
息俄頃陰雲復四布初看蒼狗呵祝融次第諸山一氣錮
游氛霧淞迷人來對眼不能辨近樹走避山房兩腳傾芒
屨倒足皆失措雷電高岡倍有權風雨荒山益生怖中夜
起坐畏霹靂天威在手儻一誤又恐巨靈挈山逃乾坤老
腐將安厝轉笑黃庭成夢游許身魏媼得無忤逝將去此
適何鄉滿目淒涼對泥塑

送魯留耕回新城

司業辭承明雲霄生快羽短翮望高搏誰與量天步諸生
叩馬留截鞭苦不悟口賦三宜休焉能爲君住廣受不出
東都門到今可有漢家傳漢家供帳幾醉醒夕陽回首夢
送寤

贈朱廣文

別後因貧仕相逢感索居官從文字冷跡與宦情疏旅食
驚新稻秋風憶舊蔬有親皆白髮對我煮江魚

賦得閒居少鄰並

江流汨汨草萋萋地闊天長景不齊儘可朝蓑漁楚澤還
能晚飯煮青泥扶桑總轡江天渺崑閬揚音島嶼迷轉信
吾生同甕瓠茫茫何處出醯雞

冉覲祖字永光號蟬庵中牟人康熙辛未進士改庶吉
士授檢討有寄願堂詩集

詩話蟬庵潛心正學初領解耿逸庵延主嵩陽書院
既通籍乞假歸張清恪方官京師其邑中築請見書
院聘蟬庵兼領說經重席著錄干
人中州理學之傳自茲益廣矣

庵居

結茅就僻境盤曲下平地啟牖納日暄抱膝可假寐入春
尚疑寒屋頭餘雪積擁爐寡朋儔折梅代把臂案書與瓶
花間雜無行次拙書惟信手看花亦隨意書到賞心時花
香忽入鼻欣然有至樂舉觴得一醉醉醒總自適脫屣遺
名利爲語風塵客誰能領此致

啟母石

大造產奇石鎮古植於此如何好事者指爲塗山氏禹也
神聖啟也賢事蹟分明垂經史異說紛紛徒浪傳堪供一
笑而已矣我來盤膝坐石陰石上題詩難徧視白石斑駁
成黛色立卧合看應相似聞說前峯洞壑幽逸興飄飄振
衣起北上層巒一縱目莽莽山川自流峙

和吳肱良中秋無月之作

高人相並玉壺清造物無端妒月明
藜杖有神吹夜火霓裳何處度新聲
蕭森雨氣凌窗入繚繞雲煙掠樹行
縱飲雄談真勝事庾樓得似此時情

張瑗字遽若祁門人康熙辛未進士改庶吉士授編修

歷官江南道監察御史有寶廉堂集

詩話遽若冠南宮入詞館遷諫議巡城見碧雲寺後有魏忠賢墓疏請毀之誅奸諛於既死一時稱快事疏述墓碑備載官階並著其字曰完吾碑後刻孝官孝孫等六七十人彼時未存一二拓本此曹乃不得遺臭考古者蓋猶有憾焉

剗毀魏忠賢墓紀事詩

彰輝表天道誅賞昭王綱伊誰實職之蘭臺橫秋霜道惟鋤奸迹庶以全善良奉命咨民事巡察思激揚攬轡出郭門陟睇西山岡廬舍匝阡陌各各營農桑厥俗一以樸民

氣尤悅康榛莽化蘭蕙無復嗥虎狼尋憩古佛刹紺碧何
輝煌背負諸墓碣壘壘如北邙更是碧雲寺封樹皆貂璫
魏奄豕踰制陵園相頡頏穹碑矗霄漢長松繚垣牆以彼
稔凶惡萬死烏足償搏噬縱鷹犬湯鑊烹鸞鳳天地盡冥
晦白日無輝光古多內侍禍茲禍踰漢唐國步倏艱阨社
稷旋淪亡彼身已寸磔墓胡留山陽父老切齒言豎黨皆
兒郎以其生前壙樹之爲幽堂惜無勇敢士培之使其僵
我聞髮上指冠衝心激昂及此不錐薙無乃忤蒼蒼繕疏
請明旨聖德奮乾剛碑仆墓亦毀狐兔將安藏堯舜除四
凶海宇稱平章誅惡及勝國來者心自臧巖壑煎穢濁草
木回芬芳聊以佐史筆憲紀于焉張

惠周惕字元龍吳縣人康熙辛未進士官密雲知縣有

硯溪詩集

沈歸愚曰硯溪先生受業於堯峯汪氏故詩格每兼唐宋然皆自出新意風神轉佳生平邃於經學貫穿融浹亦不第以詩家品目之

詩話吳中惠氏四世傳經導源硯溪至半農而大至松崖而精傳緒甚遠硯溪含茹經籍詩筆秀采天成前人以花浮小瓊三投酒乳發深蘊七品茶稱其典雅集中長律類此多可誦者樸學工詩殆罕其匹

贈傅青主先生

元晏去幾時釋勸久不作先生繼其蹤大義動寥廓弱冠便恢宏深湛鄙曲學羸然一布衣開口笑管樂偶然頌佳句完月天河濯翰墨更淋漓交莛互拏攬人間得片紙寶愛過金錯誰能盡卿材區區乃糟粕維昔天頌洞黨禍熾毒蠹吁嗟哀使君無罪嬰木索賈彪一西行正議奪謠詠歸來默無言抱影鼠邱壑家貧意彌安身老志愈慤荷篠

先春耕腰鎌待秋穫烏犍驅一具史傳挂兩角欣然足平

生俛仰幸不忤何圖天網張縱獠到山澤

廣韻藥鐸二部無澤字韻會作

達各反漢書天文志格澤地理志澤索是也

曾采捐鳳凰籠置羣鳥雀敦迫使

就途攜無一錢橐飢寒引百病侵淫及腰腳不堪蹠蹕行

穴板卧纏縛沈痾勢延綿蘆酒御不軟至尊問起居宰相

給醫藥遺之不言謝問之徒諾諾我時客京師朱門絕芒

屨一心欽英風比日請尤數先生爲我起意色都不惡吐

口一開懷片言得大略山泉本來清不受盥漱濁浮雲或

到地竦竦卽高擢文舉置西園仲御亦詣洛從來賢達流

通道恥齷齪當今瑚璉姿先後照臺閣俄然獲寶鼎光彩

半剝落摩挲意已厭那用當杯杓莫歎歸無時故山行可

約

玉簫橋望西山秋爽

苑水明於天秋山送遙碧蒼然石橋上空翠撲巾幘香餘
殘荷風涼引新桐色蔚藍冒晴巒淡沱映斜日林表生孤
煙雲邊數歸翮淡焉謝塵囂身在藐姑射

夜坐有懷

青天如澄江片月初洗出草光露離離樹影風瑟瑟寒更
夜點疏驚羽孤飛疾惆悵不成眠懷人坐終夕

同侯大年用楊鐵厓韻作歌

新煙著柳天濛濛黃鶯深坐嘯東風野人何爲帝城裏祇
唱吳歌弄春水水邊半掩誰家門暗香吹送湘娥裙回身
踏破蓮花步庫車載上山頭墓碧雲滿天人來我今且
醉葡萄杯玉露沈沈凍銀盃清歌歷歷催牙板亞字闌干

日又西閒思往事作新題蓬萊借得三足使去問揚州橋
廿四如花玉女擘花箋供寫農家白紵篇

寄湯西厓

綠酒待明月碧雲期美人一從江南別三見梨花春有客
昨夜至誦君佳句新不知懷舊作曾否到松筠

別查夏重

五載不相見見君猶布衣恩恩還作別草草不成歸柳色
侵江過梅花入路飛孤帆那忍發鄉月正依依

題姜西溟洞庭秋望圖

萬頃淪漪上行行何所之爲看青嶂出因與白鷗期曉露
零楓葉清江怨竹枝試將蕭颯意入浦問漁師

欲訪鴟夷子還尋桑苧翁斯人渺何所極浦遠空濛出沒

看孤棹參差數去鴻微吟向天末吹斷野蓮風

詠史

似說天書下紫宸築宮養贍聚流民壺飡那得移諸邑木
酪會聞活幾人肯與再生猶有策若毆爲盜豈無因公田
租挈年年重且議寬征事撫循

入關有詔勿苛留鄉部紛紛更有求民死豈關官長事歲
饑空使廟堂憂簡田比日災爲甚報政今年課最優遠近
庶司無失職欲從何處問侵牟

斤竹嶺

鳥道盤空一綫懸杖藜徐步出層巔雲埋半嶺疑無地石
壓孤峯欲蔽天廢寺草長時見鹿深林徑絕但聞泉野人
好事真癡絕別蘇題詩記歲年

泛曹娥江

晴天倒瀉落篷窗風碎羅紋漾碧幢兩岸青山雲斷續層層紅葉醉秋江

題畫鴈

獨石黃花古戍樓角鴈睥睨高秋紛挐燕雀渾無賴那得遲回不下鞦

閣詠字復申江南山陽籍太原人舉人官內閣中書有左汾近藁

詩話左汾百詩子能文章善刻印漁洋跋其印譜謂左汾文章妙一世游藝篆刻不肯屈曲以趨時好而惟古是師其於文章亦猶是矣藝云乎哉

和王阮亭少司馬西城別墅十二詠錄二

石帆亭

挂席趁長風轉瞬千萬里卻疑凝立者終古常如此片影
落尊前何辨遠與邇

半偈閣

廊廟與山林彼此了無異何以空去聲諸緣惟心持半偈月
色上方高恍悟第一義

寄顧山容學士

自笑臂鷹手還爲書榜人雕蟲原小技刻葉亦非春君故
凌雲筆余今隨路塵吾家所欣賞君出從父今嘉興守之門倍與阿咸
親

談經正字復齋遠安人舉人官福建知縣有山中吟出

山小草

飲酒作

平生興在酒往往歡相持所遇輒成醉勸酌兩不辭劃然
天地開六合照心脾榮辱共譽毀紛紛久所遺古人亦已
死來者知爲誰悠悠萬古心崢嶸並鬚眉

屋漏

茅堂亦已朽霖雨更相延菌耳生頽棟苔衣上古椽移牀
如避地敲枕自窺天陋巷栖遲日蕭條恐未然

張增字子晉宛平人舉人官寶應知縣有抑庵詩選

高堰立秋

晶晶秋光水上過微茫樹影下陂陀地連吳楚湍瀾闊天
入淮揚風雨多沙際漸看飛鶴鷺湖心猶自走黿鼉清霜
白露霑衰草蕭瑟應迴萬里波

九日感懷

不減登高興
頻年與世違
灘荒紅樹少
野曠白鷗稀
送酒人何往
題餽事已非
川原紛倚薄
獨坐竟忘歸

晚晴繆詩匯卷四十九終